

Drs. Marisol Tromp:

"Nos mester bay defini un perfil nobo pa e famia Arubano!"



ORANJESTAD (AAN) -- Segun Parlamentario Drs. Marisol Tromp a bisa durante e seminario di Aruba Junior Chamber "Abo sa kico ta matrimonio?", cu a tuma lugar diabierna ultimo na Cas di Cultura, "nos mester bay defini un perfil nobo pa e famia

Arubano, ya cu e mercado di casamento ta cambiando a consecuencia di cambianan demografico". Textualmente, Drs. Marisol Tromp a señala: "Manera ta conoci nos posible futuro generacionnan ta depende grandemente di casamento

entre un pareha. E base di nos futuro, sociedad Arubano, ta depende hopi riba e relacion entre e ser femenino y esun masculino. Mirando e hecho cu nos structura demografico a cambia drasticamente den e ultimo añanan aki, a consecuencia di, principalmente nos desaroyo economico, nos lo kier a analiza e mercado di casamento Arubano basa ariba cifranan di e ultimo tres censonan".

Desaroyo di Matrimonio den ultimo añanan

Drs. Marisol Tromp a señala cu compara cu añanan '70 e porcion di personanan cu no ta casa a baha un tiki for di 64% pa 58 % na año 1996. E bahada aki ta debi na cambianan structural den nos categorianan di edad di nos structura demografico.

"Pues debi cu nos poblacion ta birando di edad y e cantidad di hende cu tin edad pa casa ta relativamente menos compara cu esun di año '70, ta logico cu esaki ta sigui baha pa e proximo añanan. Pa loke ta trata e poblacion cu ta casa nos ta mira un bahada chiquito compara cu 1991 pero compara cu añanan '70, e 35% di 1996 ta mas hopi cu solamente 31,9%."

Notable ta cu divorcio entre

parehanan a sigui crece substancialmente for di 1,6 % na año 1970 pa 6% na año 1996" e Parlamentario a bisa, y esaki por worde observa tambe riba grafico.

E MERCADO DI CASAMENTO

Parlamentario Marisol Tromp a indica cu den e mercado di casamento por vislumbra un problema demografico.

"E cifranan di censo di 1991 ta muestra cu pa cada 5 hoben masculino Arubiano, soltero, tin 4 hoben femenino Arubiano, soltero disponible den e categoria di 15 pa 34 año di edad cu e por casa cune. Esaki ta nifica cu tin un tension basta grandi riba e mercado aki!"

Consecuentemente despues cu a bay analiza e cifranan pa wak cu cual nacion e ser femenino y e ser masculino Arubiano ta casa, Drs. Marisol Tromp a saca e siguiente conclusion, segun tabel.

Por deduci cu 70% di e sernan masculino Arubiano ta casa" tambe cu Arubiano, pero compara cu año 70 e casamento specialmente cu e ser femenino di nacionalidad latino a crece di 4.9% te cu 17.5%. Pues nos por bisa cu debi na e supuesto escasez

riba e mercado nos hobennan masculino Arubiano soltero a dicidi di bay internacionaliza nan mes.

Pa loke ta trata e ser femenino 82% ta casa du Arubiano. Aki si no por papia mucho di internacionalizacion di nos muhernan Arubiano.

Awor analizando e status matrimonial di e poblacion di nacionalidad no-Arubiano cu a bin biba aki na Aruba, nos ta mira cu mayoria di esakinnan ta casa cu un ser femenino cu no tin e nacionalidad Arubiano (62%).

Loke ta resalta si, ta cu 34% di e ser femenino cu no tin nacionalidad Arubiano cu a bin biba aki na Aruba NO ta casa.

Otro aspecto cu a resalta den e analisis di e mercado di casamento ta e fenomeno di "biba hunto sin casa of acompañaña". Esaki a crece compara cu na año '70 for di 832 te cu 1724 na año 1991. Pues un crecimiento substancial. Esaki kizas ta debi na "belastingsvoordeel" debi cu Aruba su sistema di impuesto ta progresivo, y kizas tambe na e proceso di emancipacion y individualizacion".

Den otro articulo DIARIO ta elabora riba e fenomeno di "mama soltero" manera Drs. Marisol Tromp a trece dilanti, y su sugerencionan.

Desaroyo di matrimonio y divorcio

